

## DOMENIE III «VIE PAL AN»

### Antifone di jentrade Sal 95,1.6

Cjantait al Signôr une cjante gnove,  
cjantait al Signôr di dute la tiere;  
maiestât e sflandôr a cjaminin denant di lui,  
potence e bielece a jemplin la sô cjase.

### Colete

Diu onipotent e eterni,  
indrece la nestre vite seont il to bonvolê,  
par che, tal non dal to Fi tant cjâr,  
o podin fâ ogni sorte di ben.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Ne 8,2-4.5-6.8-10

A leierin tal libri de leç e a capirin ce che a leievin.

Dal libri di Neemie

In chei dîs, il predi Esdre al puartà la leç denant de semblee dai oms, des feminis e di ducj chei che a jerin in stât di capî.

Al leïè il libri su la place denant de puarte des Aghis, di cuant che al jevâ il soreli fintremai a misdî, presince dai oms, des feminis e di ducj chei che a jerin in stât di capî; dute la int e jere intente a scoltâ il libri de leç. Esdre il scriturist al jere suntun pulpit di len, che lu vevin fat par chel cont. Esdre al davierzè il libri presince di dut il popul, parcè che al jere plui in alt di dut il popul. A pene vierzût il libri, dut il popul al jevâ in pîts. Esdre al benedì il Signôr, il Diu grant, e dut il popul al rispuindè: «Amen, amen!», alçant lis mans. Po si butarin in zenoglon cu la muse par tiere denant dal Signôr.

I levits a leievin tal libri de leç di Diu un toc a la volte e a spiegavin ce che al voleve dî e cussì a fasevin capî ce che a leievin. Neemie, che al jere il governadôr, Esdre predi e scriturist e i levits che i insegnavin al popul i diserin a dut il popul: «Cheste e je une zornade consacrade al Signôr vuestri Diu; no stait a fâ corot ni a vaî!».

Parcè che dut il popul al vaive biel che al scoltave lis peraulis de leç.

Daspò Neemie ur disè: «Lait, mangjait cjars grassis e bevêt vins dolçs e mandait une purizion a di chei che no àn prontât nuie, parcè che cheste e je une zornade consacrade al nestri Signôr; no stait a avilîsi, parcè che la gjonde dal Signôr e je la vuestre fuarce!».

Peraule di Diu.

### SALM RESPONSORIÂL dal Salm 18

R. Lis tôs peraulis, Signôr, a son spirt e vite.

La leç dal Signôr e je perfete, e rinfuarce l'anime.

La testemoneance dal Signôr no mole:

ur dà sintiment ai piçui. R.

I comandaments dal Signôr a son robe juste:

a jemplin il cûr di gjonde.

L'ordin dal Signôr al è splendit:

ur dà lusôr ai vôi. R.

La peraule dal Signôr e je monde e e dure par simpri:

i judizis dal Signôr a son vêrs e juscj dal prin al ultin;

plui che no l'aur a valin. **R.**

Che tu vedis agrât ce che e dîs la mè bocje  
e il bat dal gno cûr che al rivi a la tô presince,  
Signôr, gno ripâr e mè crete. **R.**

### SECONDE LETURE 1 Cor 12,12-30

Vualtris o sêis cuarp di Crist e parts di lui, ognidun tal so puest.

De prime letare di san Pauli apuestul ai Corints

Fradis, come il cuarp, che al è un sôl, al à tantis parts e dutis lis parts, che a son tantis, a son un cuarp sôl, cussì ancie il Crist. Di fat o sin stâts batiâts ducj intun sôl Spirt par fâ un cuarp sôl, tant Judeus che Grêcs, tant sotans che libars; e ducj o vin distudade la sêt tal medesim Spirt. Il cuarp però nol è fat di une part sole, ma di tantis parts. Se il pît al disès: «Stant che jo no soi la man, no fâs part dal cuarp», no par chel nol fasarès plui part dal cuarp. E se l'orele e disès: «Stant che jo no soi il voli, no fâs part dal cuarp», no par chel no fasarès plui part dal cuarp. Se il cuarp al fos dut voli, dulà saressial il sintî? Se al fos dut sintî, dulà saressial il nulî? Ma Diu al à disponût lis parts dal cuarp in maniere diferente, come che al à volût lui. Che se al fos dut une part sole, dulà saressial il cuarp? Invezit lis parts a son tantis, ma il cuarp al è un sôl. E il voli nol pò dîi a la man: «Tu no tu mi coventis»; ni il cjâf ai pîts: «Vualtris no mi coventais». Che anzit chêis parts che a semein plui debulis a coventin di plui; e chêis che lis ritignìn plui ordenariis lis tratìn cun plui rispiet, e chêis mancul onoradis a àn dibisugne di plui rivuart, invezit chêis plui onoradis no àn dibisugne. Ma Diu al à adatât il cuarp dant plui onôr a di chêis che a jerin cence, par che il cuarp nol fos malspartît e lis parts si judassin une cun chê altre. Cuant che une part e patîs, dutis lis parts a patissin; se une part e je onorade, dutis lis parts a gjoldin cun chê. Poben, vualtris o sêis cuarp di Crist e parts di lui, ognidun tal so puest.

Partant Diu al à metût cualchidun inte Glesie tal prin puest come apuestui, tal secont come profetis, tal tierç come mestris; po a vegnin i miracui, po i dons di vuarî, chei che a àn il don di assisti, di guviernâ, des lengthis. Sono forsit ducj apuestui? Ducj profetis? Ducj mestris? Ducj cul don dai miracui? Fevelino ducj lengthis? Lis spieghino ducj?

Peraule di Diu.

### CJANT AL VANZELI cf. Lc 4,18

**R.** Aleluia, aleluia.

Il Signôr mi à mandât

a puartâur la buine gnove ai puars,  
a contâur ai presonîrs che a son libars.

**R.** Aleluia.

### VANZELI Lc 1,1-4; 4,14-21

Vuê cheste scripture si è colmade.

Dal vanzeli seont Luche

Une vore di lôr a àn za cirût di meti adun une storie dai fats sucedûts framieç di nô, cussì come che nus ai àn contâts chei che ju àn viodûts cui lôr vôi fin dal principi e che a son i servidôrs de peraule. Istès però ancie jo, dopo di vê studiade ben ogni robe fin dal imprim, mi soi rissolût a scrivi dut par ordin, sâr Teofil, par che tu vedis une cognossince precise a rivuart di chêis robis che tu sêis stât inscuelât.

Jesù al tornà in Galilee cu la fuarce dal Spirt. La sô innomine si slargjà par dute la region. Al insegnave tes lôr sinagoghis e ducj a disevin ben di lui.

E al rivà a Nazaret, là che al jere stât tirât sù. Al jere di sabide e, seont la usance, al jentrà te sinagoghe e al jevà sù par lei. I presentarin il libri dal profete Isaie e lui, dopo di vêlu viert, si intivà tal toc là che al jere scrit: “Il Spirt dal Signôr al è parsore di me; par chel mi à onzût e mi à mandât a

puartâur la buine gnove ai puars, a contâur ai presonîrs che a son libars e a fâ viodi i vuarps; par liberâ chei che a son tibiâts e a proclaimâ l'an di gracie dal Signôr”.

Po, rodolât il volum, jal tornà al servidôr e si sentâ. Ducj chei che a jerin li te sinagoghe a vevin i vôi fis sore di lui. Alore al scomençà a dî: «Vuê cheste scriture si è colmade par vualtris che mi scoltais».

Peraule dal Signôr.

### **Su lis ufiertis**

Acete di bon voli, Signôr, i nestris regâi,  
par che o sedin santificâts  
e nus zovin pe nestre salvece.  
Par Crist nestri Signôr.

### **Antifone a la comunioñ cf. Sal 33,6**

Cjalait il Signôr e us lusaran i vôi,  
e lis vuestris musis no varan di deventâ rossis.

### **O ben: Zn 8,12**

Jo o soi la lûs dal mont, al dîs il Signôr.  
Chel che al ven daûr di me, nol cjamine tal scûr,  
ma al varà la lûs de vite.

### **Daspò de comunioñ**

Diu onipotent, ti preìn  
di dânum la gracie di une gnove vite,  
e di tignîsi simpri in bon dal to regâl.  
Par Crist nestri Signôr.